



Број/Број: **01/2a-05-1-234/11**
Сарајево/Sarajevo:12.9.2011.

KOMISIJI ZA VANJSKE POSLOVE PREDSTAVNIČKOG DOMA

ZAJEDNIČKOJ KOMISIJI ZA EVROPSKE INTEGRACIJE

KOMISIJI ZA VANJSKU I TRGOVINSKU POLITIKU, CARINE, SAOBRAĆAJ I KOMUNIKACIJE DOMA NARODA

IZVJEŠTAJ

o posjeti Mirze Kušljugića, predsjedavajućeg Komisije za vanjske poslove Predstavničkog doma, Varšavi, od 6. do 8.9.2011. godine

Mirza **Kušljugić**, predsjedavajući Komisije za vanjske poslove Predstavničkog doma, na poziv Ministarstva vanjskih poslova i Ministarstva ekonomije Republike Poljske, boravio je u Varšavi od 6. do 8. 9. 2011. godine.

Osim učešća na jednodnevnom seminaru na ekspertnom nivou o temi „**Kako ojačati i prošiti Energetsku zajednicu**“, 7. 9. 2011., na koji je **Kušljugić** prvenstveno pozvan, organizatori ove posjete u saradnji s Ambasadom BiH u Poljskoj dogovorili su i više biletaralnih sastanaka s predstavnicima izvršne i zakonodavne vlasti, te s predstavnicima poslodavaca i trgovinske komore. Održani su sastanci sa:

1. Gražynom **Bernatowicz**, državnim podsekretarom MVPRP(utorak, 6.9. u 14 sati);
2. Andrzejom **Halickim**, predsjednikom Komisije za vanjske poslove Sejma (utorak, 6.9. u 15 sati);
3. Marcinom **Korolecom**, državnim podsekretarom Ministarstva ekonomije (srijeda, 7.9. u 10,30 sati);
4. Andrzejom **Zarajczyk**im, predsjednikom Poljsko-balkanske komore (četvrtak, 8.9. u 14 sati).

U prvi plan ovog seminara stavljena je vanjska dimenzija energetske politike EU koja je prioritet poljskog predsjedavanja Vijećem EU u ovom šestomjesečnom periodu. U okviru polaznih osnova te politike poseban naglasak stavlja se na daljnji razvoj Energetske zajednice, što stvara legalnu i ekonomsku osnovu za tržišno orijentiran energetski sektor i sigurnost povećanja resursa. Neke od tema seminara bile su: **Energetski prioriteti poljskog predsjedavanja EU, Pomak prema Istoku, Energetske dileme u susjedstvu EU, Energetska dimenzija Istočnog partnerstva, Širenje Energetske zajednice na Istok, Tržišta privlačna za ulaganja-zakonska regulativa, Treći paket liberalizacije, Energetske potrebe za infrastrukturom, Prioritetni projekti od strateškog značaja za regiju, Južni koridor, Novi izazovi za 2016. godinu i dalje, itd.**

Ostali sastanci održani su kako slijedi:

1. s Grażynom **Bernatowicz**, državnim podsekretarom MVPRP (utorak, 6.9., u 14 sati);

Gdu Bernatowicz zanimalo je da li ima dobrih vijesti iz BiH u vezi s formiranjem Vijeća ministara BiH budući da Poljska podržava integracije BiH u EU. Poljsko predsjedavanje EU je dobar trenutak da nešto urade za nas i za zemlje tzv. Zapadnog Balkana, ali da joj trebaju instrumenti.

Mirza Kušljugić izrazio je skeptičnost u skoro formiranje Vijeća ministara BiH nakon sastanka političkih lidera u Mostaru prethodnog dana (5.9.2011.). Kazao je da su njihovi stavovi nakon tog sastanka najudaljeniji do sada. Stoga smatra da najvjerovatnije nećemo uspjeti predati zahtjev za kandidaturu za članstvo do kraja poljskog predsjedavanja EU. Kazao je da mu je žao što smo propustili priliku koju je pružalo poljsko predsjedavanje EU.

Bernatowicz je kazala da smo vjerovatno propustili priliku i dodala da će ih biti još, ali da ćemo morati na to dugo čekati. Danska i Kipar bit će involvirani u tematiku proširenja, ali nakon Poljske, prema njenom mišljenju, ne baš osobito, stoga ćemo čekati barem dok dođe red na Litvaniju za predsjedavanje EU. Iako je, nakon Lisabonskog ugovora, uloga zemlje koja predsjedava slabija, istaknula je njenu jaku moć u promociji i isticanju nekih tema. Izrazila je žaljenje zbog zastoja u političkom dijalogu, pogotovo što se za vrijeme posjete ministra vanjskih poslova RP Sikorskog Sarajevu, kada se susreo i s visokom povjerenicom Ashton, stekao utisak da će se u BiH uspjeti naći rješenje i ići naprijed. Istaknula je situaciju drugih zemalja u regiji koje pokazuju napredak, za razliku od BiH. Naglasila je da je EU puna problema i da ne želi uvoditi regionalne probleme u EU.

Kušljugić je kazao da će prenijeti poruku Parlamentarnoj skupštini BiH i političkim liderima. Smatra da je rano da bude optimističan zbog slabe volje s naše strane da se nađe rješenje i formira Vijeće ministara, ali je dodao da BiH zna ponekad iznenaditi. Pohvalio je rad poljskog ambasadora u Sarajevu i naše ambasadorice u Varšavi. Kazao je da, bez obzira na zastoj u dogovoru političkih lidera u BiH, treba nastaviti s aktivnostima i unapređenjem bilateralne saradnje. Izrazio je zadovoljstvo što se saradnja u oblasti poljoprivrede i turizma između dviju zemalja razvija u pozitivnom smjeru. Kazao je da je u Varšavu došao zbog učešća na ekspertnom seminaru "Kako ojačati i proširiti Energetsku zajednicu" i da smatra da je energetika oblast koja nudi višestranu mogućnost saradnje. Istaknuo je sličnosti između BiH i Poljske na polju energetike jer se ona u obje zemlje temelji na korištenju uglja. Također je podsjetio da je većina termoelektrana u BiH poljske proizvodnje. Upoznao je svoju sagovornicu da ima sastanak o toj temi u Ministarstvu ekonomije RP i da očekuje unapređenje saradnje i realizaciju tehničke pomoći Poljske BiH. Zahvalio se na pomoći i podršci koju je Poljska pružila BiH od poslijeratnog perioda do danas: učešće u mirovnim snagama, ustupanje BiH kandidature za nestalno članstvo u VSUN-a, bezvizni režim i istaknuo trenutno aktuelnu podršku Poljske, a to je za kandidaturu grada Sarajeva za Evropsku prijestolnicu kulture 2014. godine.

Bernatowicz se saglasila s tim da je pružanje tehničke pomoći i transfer znanja važan za zemlje koje imaju evropske aspiracije jer je i njihov slučaj s evropskom perspektivom bio sličan, čak se spominjalo da su zemlje Zapadnog Balkana u boljoj situaciji nego zemlje Istočne Evrope. Njih je na tom putu učila Španija. Podržavaju saradnju u jačanju naših administrativnih kapaciteta. Ponovila je podršku Poljske za najavljenju kandidaturu Sarajeva.

U vezi s energetikom, kazala je da Poljska u velikoj mjeri zavisi od energije koja se temelji na uglju i da su zahtjevi EU o smanjenju Co2 plinova ne samo ekonomski nego i veliki socijalni problem. Morat će naći odgovarajuća rješenja, pogotovo što nuklearna energija,

zbog posljednjih događaja u svijetu, ne nailazi na veliku podršku.

U vezi s jačanjem bilateralne saradnje, kazala je da je upoznata s nedavnom posjetom ministrice za regionalni razvoj RP Bienkowske Bosni i Hercegovini koja je bila jako uspješna. Složila se s pozitivnim razvojem saradnje u oblasti turizma i pohvalila angažman ambasade BiH u tom polju.

2. Andrzejom **Halickim**, predsjednikom Komisije za vanjske poslove Sejma (utorak, 6.9. u 15 sati);

Andrzej Halicki, predsjednik Komisije za vanjske poslove Sejma, upoznao je sagovornike o aktivnostima u Sejmu i tek završenoj konferenciji COFACC-a (Konferencija predsjednika komisija za vanjske poslove parlamenata zemalja članica EU) koja je bila vrlo uspješna, odličnog odziva, važnih gostiju i najduža do sada – trajala je tri dana. Prvi put su se u historiji COFACC-a sastali nedjeljom. Posjetila ih je visoka povjerenica za vanjsku politiku Ashton koja je došla u Varšavu iz Sopota s Gymnich sastanka MVP. Halicki je kazao da je za njega jedan od ključnih prioriteta u radu Komisije bila politika otvorenih vrata za proširenje EU. Idući mjesec u Poljskoj su parlamentarni izbori i ako ostane u Sejmu, nastaviti će raditi u tom smjeru.

Za neke zemlje članstvo u EU je bilo automatski proces i potrebno je raditi na razumijevanju procesa priključenja jer to nije samo tehničko već imanentno političko pitanje. Širenje područja slobode i demokratije znači više sigurnosti za EU. Istaknuo je manjak odlučnosti EU prema istočnim susjedima, a takvo gubljenje vremena ima negativan uticaj i na EU u smislu ilegalne imigracije, nestabilnosti (Bjelorusija, Azerbejdžan-Armenija; Gruzija-Rusija i sl.). Evropa ima obavezu da ostavi otvorena vrata za nove članice.

Kušljugić je upoznao Halickog o radu Parlamentarne skupštine BiH koja je po broju članova u oba doma znatno manja nego poljski Sejm i Senat. Upoznao ga je s aktuelnom političkom situacijom u BiH. Ukazao je na potrebu da se unaprijedi postojeća saradnja dva parlamenta. Kazao je da se nada da će Halicki ostati u Sejmu i doprinijeti tome. Naglasio je da je naše opredjeljenje da se ojača uloga parlamenta u vanjskog politici te ostvari bolja koordinacija s nadležnima za vanjsku politiku u BiH (Predsjedništvo BiH, MVPBiH). Pri tome treba osnažiti ulogu tzv.parlamentarne diplomatije, istakao je on. Uputio je poziv Komisiji za vanjske poslove Sejma (nakon izbora) da posjeti Parlamentarnu skupštinu BiH.

Halicki je kazao da će rado doći u Sarajevo ako bude ostao u Sejmu, ali bez obzira na to ko bude u Sejmu, vjeruje da će saradnja dva parlamenta ići u smjeru jačanja međusobnih odnosa.

3. Marcinom **Korolecom**, državnim podsekretarom Ministarstva ekonomije (srijeda, 7.9. u 10.30 sati);

Na sastanku s Marcinom Korolecom, državnim podsekretarom Ministarstva ekonomije RP, Mirza **Kušljugić** predstavio je aktuelnu energetska situaciju u BiH i istaknuo njene sličnosti s Poljskom. Podsjetio je na odličnu saradnju u tehničkom i edukativnom smislu za vrijeme bivše Jugoslavije što je potrebno aktuelizirati. Kazao je da se BiH trenutno nalazi u važnom trenutku kada treba donijeti strateške odluke za budućnost energetske politike i strategije. Prijenos tehnologije i znanja iz Poljske bio bi vrlo koristan za BiH, tim više što je većina termoelektrana u BiH poljske proizvodnje. Predložio je posjetu poljskih eksperata BiH u okviru TAIEX programa kao prvi korak. Upoznao je sagovornika o prijedlogu da Poljska bude zemlja partner na Sajmu tehnologije u Tuzli 2012. godine.

Korolec je kazao da član 5. Sporazuma o ekonomskoj saradnji predviđa mehanizme za konkretnu saradnju u oblasti energetike i sastanke međuvladinih ekonomskih komisija barem jednom godišnje. Budući da taj sporazum još nije potpisan, obećao je da će ubrzati proceduru s njihove strane. Iako ne zna da li će biti u ministarstvu nakon izbora, kazao je da se

početkom iduće godine, kada Poljska završi predsjedavanje EU, mogu održati bilateralne međuvladine konsultacije o navedenim pitanjima. Na prijedlog o posjeti eksperata, kazao je da se ta posjeta može organizirati vrlo brzo i bez TAIEX programa. Dovoljno je da im naša strana uputi zahtjev koja vrsta eksperata nas treba posjetiti.

Kazao je da je BiH upućen poziv na sastanak ministara energetike zemalja članica EU i Energetske zajednice, koji će se održati u Vroclavu 19. i 20.9.2011. Smatra da bi to bila odlična prilika da se upoznamo s aktuelnim temama i debatama o energetici. Dao je i prijateljsku sugestiju kako bi BiH trebala razmišljati o cijeni električne energije i biti okrenuta više prema kompetitivnosti na tom planu.

4. Andrzejom **Zarajczyk**, predsjednikom Poljsko-balkanske komore (četvrtak, 8.9., u 14 sati).

Na sastanku sa **Zarajczyk** ambasadorica BiH u Poljskoj Kovička Špirić ukratko je predstavila sagovornike. Pohvalila je odličnu saradnju Zarajczyka s Ambasadom BiH u Varšavi i istaknula da je joj je drago što ima pravog sagovornika za njega kada je u pitanju energetika jer je Kušljugić ekspert u toj oblasti.

Zarajczyk je predstavio aktivnosti svoje kompanije Pol-Mot i najnovije investicije (kupovinu URSUS traktora, pogoni bio-mase u Vojvodini, izgradnja stanova u Beogradu, hotel na hrvatskom primorju). Podsjetio je na odličnu saradnju s bivšim velikim kompanijama iz BiH: Famosom, Unisom i dr. Predstavio je nekoliko mogućnosti saradnje s BiH: kooperativna proizvodnja za komponente teretnih vozila, ponuda poljoprivredne mehanizacije i proizvodnja bio-mase budući da je Pol-Mot najveći proizvođač bio-mase u Poljskoj. Podsjetio je na mogućnost dobivanja povoljnih kredita jer BiH, za razliku od nekih susjeda, nije iskoristila sve mogućnosti. Izrazio je interes za ulaganje u energetske sektor i to u manje hidroelektrane do 10MW.

Kušljugić je upoznao sagovornika o aktuelnoj energetskej situaciji u BiH. U vezi s ulaganjima u hidroelektrane, upoznao ga je s načinima investiranja: zajednička ulaganja; kupovina koncesije i kupovina građevinske dozvole. Također mu je rekao da su trenutno vrlo zainteresirani za takva ulaganja Slovenija, Njemačka, Turska i Kina.

Zarajczyk je izrazio veliko zadovoljstvo zbog susreta i kazao da treba iskoristiti mogućnosti povoljnih kredita u Poljskoj u oblasti energetike. Izrazio je spremnost da dođe u BiH i razgovora o konkretnim prijedlozima za investiranje.

Razgovor je ocijenjen vrlo korisnim s obje strane i dogovoreno je da se kontakti nastave.

Izvještaj sačinila Merdžana Iglica, sekretar Komisije za vanjske poslove PDPSBiH

Dostavljeno:

- naslovu
- Sektoru za međunarodne odnose i protokol PSBiH
- Ministarstvu vanjskih poslova BiH
- a/a